

Avis dl Comun de San Martin de Tor di 21.04.2021

Por l'esecuziun di tesé antigenics asvelc á le Comun l'intenziun da inciarié n valgönes porsones cun n contrat de laur autonom ocajional.

Scomenciamënt: dai 03.05.2021.

Frecuënza y orar: vigni lönesc y jöbia dales 7.00 - 10.00 y dales 17.00 - 19.00 cun poscibilité de n ampliament dl orar.

Sort de inciaria: contrat de laur autonom ocajional aladô dl art. 2222 cod. ziv.

Retribuziun: 20 Euro brutto al'ora cina alplü 5.000 Euro.

Condiziuns nezesciaries: eté nia sot a 18 agn; conclujiun dla scora mesana; conescënza dl lingaz ladin, talian y todësch; conescënzes de computer (ma por porsones dl'azetaziun/backoffice-lëtra a) dl formular dla domanda; desponibilité por duc i dis dl'edema preodüs.

Criters preferenziai por le conferimënt dl'inciaria:

1. residënza tl Comun; 2. titul de stüde plü alt; 3. desponibilité por trami i orars dl de; 4. desponibilité por almanco 3 mëisc indolater; 5. plü jogn/nes d'eté.

Les domandes, do le formular injunté a chësc avis, mëss rové te Comun tl ofize de protocol, cina al termo: dedemesaledema, 28.04.2021, dales 12.00 Informaziuns ciafëise te Comun pro sig. David Costabiei, tel. 0474 - 524 377.

PLOANIES SAN MARTIN Y LUNGIARÜ

Dal mëis de ma inant é na mudaziun dl orar por la mëssa prefestia dla sabeda sëra, che sará a **Lungiarü dales 18.00 y a San Martin dales 19.30** - - - - -

Le Sorvisc ai Jogn lascia alsavëi che les iscriziuns al proiet JABA (da 13 a 19 agn) pëia indô ia ai 4 de ma tl Sorvisc ai Jogn a Picolin o tl Zënter dla Jonëza SaJ.un a La Ila. Jogn y jones che n'á nia ciamó arjunt la majera eté mëss gní acompagná da n genitur. Le cost d'iscriziun é de 2 euro.

I Stödafüch da San Martin, i Stödafüch da Lungiarü y la Musiga prëia dër bel do osc aiüt por sostigní súa ativité. Pro la detlaraziun dla cuta podëise nes destiné le 5 pormile y nes daidé insciö da curí na pert dles spëises ch'i un ia por l'ann. Por os ne comporta chësta destinaziun degun cost implü; al é ma da dé dant nosc codesc fiscal y da sotescri:

Stödafüch da San Martin - codesc fiscal: 92009210219

Stödafüch da Lungiarü - codesc fiscal: 92009030211

Musiga de San Martin de Tor - codesc fiscal: 81009430216

Döt le bun a chi che complësc i agn de ma

a San Martin Emma Costabiei che nen complësc 84 al 1
Nina Rubatscher Tolpeit nen complësc 91 al 1
Zita Prada Planatscher nen complësc 86 ai 5
Pio Baldissera che nen complësc 92 ai 8
Sefl Prousch che nen complësc 83 ai 23

a Lungiarü Monica Mischi Daporta nen complësc 85 ai 13



Plata dles Ploanies San Martin y Lungiarü

ploan Klaus Sottsas 344 15 54 055 - klsottsas@rolmail.net
siur curat Heinrich Perathoner 339 65 74 213

redaziun: anton.gasser@rolmail.net - 348 27 44 517 / 0474 523 194

www.valbadiaonline.it/comunita

25.04. - 02.05.21 nr. 22

CUARTA DOMÈNIA DE PASCA - B

Vangele do Jan 10,11-18

Iö sun le bun famëi. Le bun famëi dà ca súa vita por les bisces. Le fant tut sô a païamënt indere, che ne n'é nia famëi y de chël che les bisces ne n'é nia, lascia les bisces sores y s'un sciampa canch'al vëiga gnon le lu; le lu les scherza y les sprigora indalater. Al s'un sciampa, cíodi ch'al é mâ n fant a païamënt y cíodiche les bisces ne ti un vel nia. Iö sun le bun famëi; iö conësci i mi, y i mi conësc më, sciöche le Pere conësc më y iö conësci le Pere; y iö dà ca mia vita por les bisces.

I à ciamó d'atres bisces, che n'é nia fora de chësta stala; ince chëres mëssi condüje y ares ascutarà mia usc; spo saral mâ un n pastorëc y un n famëi. Porchël m'ôl bun le Pere, deache iö dà ca mia vita, por la tó indô derevers....



"I á ciamó d'atres bisces, che n'é nia fora de chësta stala..." chëstes parores fora dl vangele da incö á so pëis. Dan dala imaja dl bun famëi sunse tentá da miné che Gejú é ma nosc famëi: al ciara ma de nos y é ma mort por nos. Chësta nosta minunga ne corespogn bëgn nia ala intenziun de Gejú. Le bun famëi ne se lascia nia fá so da n valgügn grups cun sües imaginaziuns. La dediziun de Gejú é infinida y n'é nia limitada a ôna na stala o a nosta stala y gnanca ma ales stales cristianes. Ci bisces che alda pro "mies bisces" ne savunse nia, chël sá ma Chël Bel Dî. Mo chësc pó nes ester de consolaziun. Deache insciö ne tomi gnanca iö fora dl tlap, de chël che Idî fistidiëia. Dër gonot ne sunsi gnanca iö na biscia blancia y nëta, plütosc grija, datrai ince foscia. Mo ince chisc corusc é ma te nosta imaginaziun, deperpo che la larghëza de Dî é infinida y ne stlúj fora degügn. (Image)

EDEMA	SAN MARTIN	LUNGIARÜ	Oraziun por na comunité cristiana <i>Signur Gejú Crist, t'as dit: "Periede, spo ves gnarál dé; chiride, spo ciarfarëise, tlocorede, spo ves gnarál daurí."</i> <i>Insciö gnunse cun fidënza da te y periun por nosta comunité.</i> Oh Dî, che t'ascutes sô, <i>sideste amesa nos y insëgnesse da ascuté sô ci che i atri nes dij y da se gni un cun l'ater.</i> Oh Dî, che te varësces, <i>sideste amesa nos y conforta i amarà y consolëia chi che l'à ria.</i> Oh Dî, che te renforzes, <i>sideste amesa nos y scinchi tlarëza a chi che dubitëia y coraje a chi che s'la vëiga.</i> Oh Dî, che te scinches ca, <i>sideste amesa nos y implëscesse cun les scincundes dl Spirit Sant y deuresse le cör da les pié do.</i> Oh Dî, che te dëides, <i>sideste amesa nos ch'i sorviunse te y se daidunse danter nos cun nüsc talënc.</i> Oh Dî, che te nes os bun, <i>sideste amesa nos y fà fora de nos tües discepules y tü discepui, animá da tüa parora, arjigná da la tó sô y da la testimonié.</i> <i>I periun por l'interzesciun de nosta Uma Maria y dl/a patron/a de nosta ploania, che la grazia de Dî sides da odëi te nosta comunité. Amen. (F.K.)</i>
25.04.2021 CUARTA DOMËNIA DE PASCA - B <i>Domënia dles Vocaziuns</i>	9.00 Corona por Vocaziuns 9.30 Gran Mëssa por la Comunité families de Giovanni Unterweger + Nando Flöss, Anvì	7.55 Corona 8.15 Gran Mëssa por la Comunité a d'intenziun a siur Heinrich Videsott	
26.04.21 Lönesc <i>Maria dal Bun Consëi</i>			
27.04.21 Dedolönesc <i>Pire Canisius, Zita</i>	19.00 Mëssa + Erwin Rungger (dl ann) ++ Tolpeit da Ju por les Animes plü arbandonades		
28.04.21 Dedemesaledema <i>Pire Chanel, Valeria</i>		7.30 Mëssa por fam. de Giorgio Moling ++ de fam. Nazio y Loise Clara ++ de Fornata	
29.04.21 Jöbia <i>Caterina da Siena</i>	7.30 Mëssa por benefaturs vis y defunc por les Animes dl purgatore Corona por Vocaziuns		
30.04.21 Vëndres <i>Pio, Hilda, Rosamunda</i>	18.30 Adoraziun chîta 19.00 Adoraziun deboriada	7.30 Mëssa por fam. Albert Dapoz + Gottfried Dapoz + Josef Pold	
01.05.21 Sabeda <i>Ojöp Laurant</i> <i>Festa dl laur</i>	19.30 Mëssa prefestia ++ Burchia y Ferdigg + Sepl Flöss d'Arzó ++ de Frida y Franz Planatscher	18.00 Mëssa prefestia en onú de San Florian por i Stödafüch de reng. fam. Hans Peter y Maria Teresa Clara + Nando Clara ++ Sisto y Mattia Clara ++ Iaco y Veneranda Clara	
02.05.21 CUINTA DOMËNIA DE PASCA - B	9.00 Corona por vocaziuns 9.30 Gran Mëssa por la Comunité <i>cun siur Klaus</i> en onú de San Florian por i Stödafüch + Tone Tolpeit (dl ann) <i>La prozesciun ne sciafia nia da gni tignida</i> 19.30 Corona de ma sô Ju	7.55 Corona de Ma 8.15 Gran Mëssa por la Comunité <i>cun siur Klaus</i> 15.00 Corona tla capela de S. Ojöp Fr.	